

**Siunnersuut: Ilageeqarneq pillugu Inatsisartut inatsisaata allanngortinneqarneranik  
Inatsisartut inatsisaat nr. xx, xx.2013-imeersoq**

(Ilageeqarnermi atorfinitsitsisarneq, uppersarsaatit akiliuteqartarneq palasit ajoqillu upperisarsiornerup tungaatigut pissuteqartumik ilagiinni suliassanik suliaqarnissanut pisussaajunnaarsitaasarnerat, aalajangiinernik allaffissornermi ingerlatsisunut qulliunerusunut suliassanngortitseqqittarnernik killiliineq kiisalu allaffissornermi pinngitsoorani malittarisassiortarnissaq pillugu aalajangersakkat)

**§ 1**

Ilageeqarneq pillugu Inatsisartut inatsisaanni nr. 9-mi, 19. maj 2010-meersumi imaattunik allannguuteqartitsisoqassaaq:

**1. § 4, imm. 1** imatut oqaasertalerneqassaaq:

”Naalakkersuisut Biskoppimik isumaqatigiinniuteqareernikkut naalagiaritsisarnermi ilagiinnilu iliuuserisat pillugit aalajangersakkanik aalajangersaasinnaapput.”

**2. § 4, imm. 2-mi** imatut oqaasertalerneqassaaq

”Imm 2. ”liturginik, ritualinik, tussiutinik tussiutinullu ilassutinik Biskoppin inassuteqaateqareerneratigut atuutilersitsisarneq pillugu Naalakkersuisut aalajangersakkanik aalajangersaasinnaapput.”

**3. § 7, imm. 3-tut** ilanngunneqassaaq:

“§ 3. Naalakkersuisut Biskoppimik atorfinitsitsillutillu soraarsitsisassapput.“

**4. § 9, imm. 1** imatut oqaasertalerneqassaaq:

“Ilagiit sinniisaasa inassuteqaateqareernerisigut provsteqarfiup ingerlatsineranut ukiumoortumik aningaasanut missingersuusiaq provstip suliarissavaa, taamaattoq tak. § 6, aalajangersakkallu Naalakkersuisunit Biskoppi isumaqatiginiareerlugu aalajangersarneqartut malillugit aningaasanut atugassiissutinut akisussaalluni.“

**5. § 14-imi imm. 2-mi** aamma **imm. 3-mi** imaattut ilanngunneqassapput:

”Imm. 2. Palasi imaluunniit ajoqi upperisarsiornerup tungaatigut pissuteqartumik ilagiinni suliassanik suliaqarnissanut suliassanullu peqataanissamut pisussaajunnaarsinneqarsinnaavoq.“

”Imm. 3. Palasip ajoqilluunniit pineqartup suliaq provstimut saqqummiutissavaa. Provstip suliaq biskoppimut saqqummiutissavaa kingornatigullu biskoppip aalajangissavaa palasi ajoqiluunniit suliami tassani suliaqarnissamik pisussaajunnaarsinneqarsinnaanersoq.“

**6. § 15, imm. 4** imatut oqaasertalerneqassaaq:

“Imm. 4. Atuagarsuarnik allattuisarneq pillugu Naalakkersuisut Biskopimut isumaqatigiinniareernikkut aalajangersakkanik aalajangersaasinnaapput.”

**7. § 16, imm. 4** imatut oqaasertalerneqassaaq:

”Imm. 4. Provsti provsteqarfimmi tamarmiusumi taasisinnaatitaanani ilagiit sinniisaasa ataatsimiinneranni peqataasinnaatitaavoq.”

**8. § 18, imm. 4, oqaaseqatigiit 2.** imatut oqaasertalerneqassaaq:

”Allattaaviup akuerineqartup assilinera provstimut biskoppimullu paasissutissatut nassiunneqassaaq.”

**9. § 20, imm. 1** imatut oqaasertalerneqassaaq:

“Palasi atuagarsuarnik allattuisoq palaseqarfimmi oqaluffiit illuutaat toqusullu inaat taakkununga ilanngullugit Naalakkersuisunit aalajangersarneqartut malillugit nakkutigissavaat. Nakkutilliineq najukkami ilagiit sinniisaat suleqatigalugit pissaaq. Palasi atuagarsuarnik allattuisoq palaseqarfimmi nakkutilliineq pillugu ukiumoortumik nalunaarusiamik provstimut nassiussissaaq. Illuutit isumannaatumik aserfallatsaalinissaat provstip isumagissavai.”

**10. § 21, imm. 1** imatut oqaasertalerneqassaaq:

„Ilagiit sinniisaasa oqaluffinnik toqusullu inaannik sananissamut, aaqqissornissaannut, aserfallatsaaliornissaannut pinnersarnissaannullu kiisalu init naalagiartarfittut atorneqartut (atuarfiit naalagiartarfiutigisut) aaqqissornissaannut pinnersarnissaannullu siunnersuutit palasimut atuagarsuarnik allattuisuusumut saqqummiutissavaat.“

**11. § 26-p** kingorna kapitalit nutaat ilanngunneqassapput:

## **“Kapitali 7**

### *Atorfinitsitsinermut sulilernissamullu piumasagaatit*

**§ 26 a.** Kalaallit Nunaanni ilagiinni palasitut atorfinni atorfinissinnaapput:

- 1) inuit upperisarsiornerup tungaatigut Ilisimatusarfimmi bacheloritut naammassinnissimasut imaluunniit danskit universitetianni upperisarsiornerup tungaatigut kandidatitut soraarummeersimasut kingornatigullu pastoralseminariumimi ilinniarnermik ingerlatsisimasut,
- 2) inuit ilisimasat tungaasigut ilinniarfissuarmi ilinniartitsisunngorniarnermut nallersuussinnaasumik ilinniarsimasut, tamatumalu saniatigut kristumiussutsimut ilisimatusarnermi malittarisassat Naalakkersuisunit aalajangersarneqartut malillugit ingerlaqqiffiusumik ilinniarsimasut, aammalu

3) inuit ilagiinni danskit naalagaaffiata tapersersugaanni palasiusimasut imaluunniit palasiunissamat piumasaqaatinik naammassinnissimasut.

*Imm. 2.* Kalaallit Nunaanni Ilagiinni palasit ilagiinni danskit naalagaaffiata tapersersugaanni ilaasortaassapput.

*Imm. 3.* Kalaallit Nunaanni Ilagiinni palasit malittarisassat Naalakkersuisunit suliarineqartut naapertorlugit kalaallit oqaasiinik ilisimasaqassapput.

*Imm. 4.* Palasit ilinniarnernut ilinniaqqinnerannullu ilagiit ilinniarsianni ilinniarnernut peqataasimanissaq palasit atorfinititsinissamat piumasaqaataanissaa Naalakkersuisut aalajangersinnaavaat. Tamanna pillugu malittarisassanik erseqqinnerusunik Naalakkersuisut aalajangersaasinnaapput, tassunga ilaalluni pikkorissarnermi akissarsiaqarneq.

**§ 26 b.** Naalakkersuisut biskoppip inassuteqareerneratigut inuk § 26 a, imm. 1-imi piumasaqaatinik naammassinnissimangitsoq palasit atorfimmi atorfinitinneqarnissaannut immikkut ittumik akuerisinnaavaat.

**§ 26 c.** Naalakkersuisut biskoppip inassuteqareerneratigut ilinniarnernup tungaatigut piumasaqaatinik § 26 a, imm. 1, nr. 1 aamma nr. 2-mi taaneqartunut taarsiullugu aalajangersakkanik aalajangersaasinnaapput inunnik piumasaqaatinik taakkuninnga naammassinnissinnaasunik amigaateqartoqassappat.

**§ 26 d.** Kinaluunniit Kalaallit Nunaanni ilagiinni palasit atorfinitinneqartoq biskoppimit soraarummeersinneqarsimassaaq, ivertinneqarsimassaaq, ilagiinnut palasit neriorsuisimassaaq biskoppillu uppernarsaasigaanik palasit sulisinnaanngortitaasimassalluni.

#### *Palasit atorfinititsinermi suleriaatsit*

**§ 26 e.** § 26 f malillugu oqaaseqaammik tunniussisoqarnissaa pitinnagu sapinngisamik biskoppip imaluunniit provstip biskoppip piginnaatitaata aamma ilagiit sinniisaanni ilaasortat qinikkat akornanni qinnuteqaatinik ilisimatitsiffiusumik ataatsimiittoqassaaq. Ataatsimiinnissaq qinnuteqarfissamat piffissaliussap kinguninnguatigut biskoppimit aalajangerneqassaaq biskoppimillu provstimilluunniit biskoppimit piginnaatinneqartumit aqunneqassalluni. Ilagiit sinniisaannit ataatsimit arlalinnilluunniit qinnuiginnittoqareerneratigut imaluunniit tamanna biskoppimit kissaatigineqarpat biskoppip ilagiillu sinniisaasa akornanni ilisimatitsiffiusumik allamik ataatsimiittoqassaaq.

*Imm. 2.* Ilisimatitsiffiusumik ataatsimiinnermut imm. 1-imi taaneqartumut piffissaliussanut periusissanullu malittarisassanik Naalakkersuisut aalajangersaasinnaapput.

**§ 26 f.** Palaseqarfimmi palasit atorfinnut inuttaqanngitsunut atorfinititsinissaq pillugu palaseqarfimmi ilagiit sinniisaannit qinikkat oqaaseqaammik tunniussaqaassapput. Sapinngisamik biskoppip ilisimatitsiffiusumik ataatsimiititsinerata kinguninngua oqaaseqaateqarfiusumik ataatsimiittoqassaaq. Oqaaseqaat taasiffissatut pingaarnersiorlugu

tunniunneqassaaq, ilagiillu sinniisaat ajornanngippat peqataasut 3-t taaneqarsinnaasuni piukkunneqartunik taaneqarnerpaanik nalunaaruteqassallutik.

*Imm. 2.* Biskoppi sapinngisamik qinnuteqartunik pingasunik pingaarnersiorlugit tulleriiaarneqartunik inassuteqassaaq. Biskoppip qinnuteqaatit ilagiit sinniisaasa oqaaseqaataannik ilallugit kiisalu nammineq inassuteqaanni ilanngullugu Naalakkersuisunut nassiutissavai.

**§ 26 g.** Palasitit atorfimmi kina atorfinitsinneqassanersoq Naalakkersuisut aalajangissavaat, tak. §§ 26 e aamma 26 f. Qinnuteqartoq biskoppip inassuteqaataanut ilanngunneqanngitsaq atorfinitsinneqarsinnaanngilaq biskoppi oqaaseqaateqarsimatinnagu.

**§ 26 h.** Qinnuteqartoq ilagiit sinniisaasa oqaaseqaataannut ilanngunneqarsimanngitsaq Naalakkersuisut atorfinitsissinnaanngilaat. Qinnuteqartoq ilisimatitsiffiusumik ataatsimiinnermi siullermik taasisoqarnerani tamanit qinerneqartoq peqataanillu biskoppip inassuteqaataani ersertoq atorfimmi atorfinitsinneqassaaq.

*Imm. 2.* Immikkut ittumik pissutissaqartoqarpat nutaamik inuttassarsiuisoqarnissaa nutaamillu inassuteqartoqarnissaa Naalakkersuisut aalajangersinnaavaat.

**§ 26 i.** Suliffeqarfinnut inunnulluunniit ilagiit sinniisaannik pilersitsiffiusimanngitsunut sullissinissaq siunertaralugu palasitit atorfiit tamakkiisumik ilaannakuusumilluunniit pilersinneqartut inuttalernissaanni periusissanut malittarisassanik Naalakkersuisut aalajangersaasinnaapput. Tamanna aamma atuuppoq ukioq ataaseq angullugu sivikinnerusumik atorfinitsitsisoqassatillugu.

#### *Provstinik atorfinitsitsinnermi suleriaaserineqartoq*

**§ 26 j.** § 26 k malillugu oqaaseqaammik tunniussisoqarnissaa pitinnagu sapinngisamik biskoppip imaluunniit provstip biskoppip piginnaatitaata aamma ilagiit sinniisaanni ilaasortat qinikkat akornanni qinnuteqaatinik ilisimatitsiffiusumik ataatsimiittoqassaaq.

Ataatsimiinnissaq qinnuteqarfissamut piffissaliussap kinguninnguatigut biskoppimit aalajangerneqassaaq biskoppimillu provstimilluunniit biskoppimit piginnaatinneqartumit aqunneqassalluni. Ilagiit sinniisaannit ataatsimit arlalinnilluunniit qinnuiginnittoqareerneratigut imaluunniit tamanna biskoppimit kissaatigineqarpat biskoppip ilagiillu sinniisaasa akornanni ilisimatitsiffiusumik allamik ataatsimiittoqassaaq.

*Imm. 2.* Ilisimatitsiffiusumik ataatsimiinnermut imm. 1-imi taaneqartumut piffissaliussanut periusissanullu malittarisassanik Naalakkersuisut aalajangersaasinnaapput.

**§ 26 k.** Provsteqarfimmi ilagiit sinniisaat qinikkat provsteqarfimmi provstitut imaluunniit domprovstitut atorfinnut inuttaqanngitsunut atorfinitsitsinissaq pillugu oqaaseqaateqassapput. Sapinngisamik biskoppip ilisimatitsiffiusumik ataatsimiititsinerata kinguninngua ilisimatitsiffiusumik ataatsimiittoqassaaq.

*Imm. 2.* Biskoppi sapinngisamik qinnuteqartunik pingasunik pingaarnersiorlugit tullerriaarneqartunik inassuteqassaaq. Biskoppip qinnuteqaatit ilagiit sinniisaasa oqaaseqaataannik ilallugit namminerlu inassuteqaanni ilanngullugu Naalakkersuisunut nassuitissavai.

**§ 26 l.** Naalakkersuisut aalajangissavaat provstitut imaluunniit domprovstitut atorfimmuut kina atorfinitsinneqassanersoq. Qinnuteqartoq biskoppip inassuteqaataanut ilanngunneqanngitsoq atorfinitsinneqarsinnaanngilaq biskoppi oqaaseqaateqartinnagu.

*Stk. 2.* Provsti palaseqarfimmi provsteqarfiup allaffiata inissisimaffiani najugaqarlunilu sulissaaq.

*Kalaallit Nunaanni ilagiit ataanni ilagiinni sulisut allaffeqarfinnilu sulisut qassiunissaat kiisalu atorfiit ilaannut atorfinitsitsinissamut oqartussaasut*

**§ 26 m.** Biskoppi Naalakkersuisut isumaqatiginiareerlugit Kalaallit Nunaanni ilagiit ataanni ilagiinni sulisunut allaffeqarfinnilu sulisunut atorfiit pilersinnissaat atorunnaarsinnissaallu pillugit aalajangersakkanik aalajangiissaaq.

*Imm. 2.* Biskoppip, palasimik atuagarsuarnik allattuisumik ilagiillu sinniisaannik tusarniaareernerup kingorna, ajoqinik organistinillu atorfinitsitsinissamut soraarsitsinissamullu provstit piginnaatissinnaavai.

*Imm. 3.* Biskoppip, palasimik atuagarsuarnik allattuisumik ilagiillu sinniisaannik tusarniaareernerup kingorna, oqaluffinni ikiortinut, soorlu pedelit, eqqiaasut il.il., atorfinitsitsinissamut soraarsitsinissamullu provstit piginnaatissinnaavai.

*Imm. 4.* Provsteqarfinni palaseqarfinnilu allaffinni allaffissornikkut sulisunik atorfinitsitsinissamut soraarsitsinissamullu provstit biskoppip piginnaatissinnaavai.

## **Kapitali 8**

### *Akiliutinik akiliisitsisarneq*

**§ 26 n.** Atermik allannqortitsiniarluni kallerriuteqarnermi tamatigut akiliuteqartoqartassaaq.

*Imm. 2.* Atermik allannqortitsineq akuerineqartoq atermik allannqortitsinermut uppernarsaammik aamma inunngornermut/kuisinnermut uppernarsaammik imaluunniit inunngornermut/atserneqarnermut uppernarsaammik uppernarsarneqassaaq. Uppernarsaammik taamaattumik tunniussinermi immikkut ittumik akiliuteqartoqassanngilaq.

*Imm. 3.* Ilagiit oqartussaasulluunniit allat aqqutigalugit atermik allannqortitsinerup kingunerisaanik uppernarsaatinik allanik tunniussinermi tunniusseqqinnermituulli akiliummik akiliuteqartitsisoqassaaq, tak. § 26 o.

**§ 26 o.** Atuagarsuit imarisaat aqqutigalugit uppernarsaammik tunniusseqqinnermi akiliutigineqartussat ukuupput:

a) Inunngornermut/kuisinnermut uppernarsaat

- b) Inunngornermut/atserneqarnermut uppernarsaat
- c) Inunngornermut uppernarsaat
- d) Katinnermut uppernarsaat
- e) Toqusumik nalunaarut

§ 26 p. Oqaatsit marluiit atorlugit, kalaallisut/tuluttut, atuagarsuit imarisaat aqutugalugit uppernarsaammik tunniussinnermi akiliuteqartoqartassaaq.

§ 26 q. Oqartussat aningaasartuutaannut matussusiinissamut atorneqartussanut akiliutigineqartut akilersinnissaannut akiliutillu annertussusissaannut malittarisassat sukumiinerusut aalajangersarnissaannut Naalakkersuisut piginnaatinneqarput, tak. §§ 26 n – 26 p.“

Kapitalit 7 maanna aamma 8 matuma kingorna imaalissaput kapitali 9 aamma 10.

12. § 28, *imm.* 3 imatut oqaasertalerneqassaaq:

”*Imm.* 3. Biskoppip aalajangigai aalajangiinnermut sapaatip akunneri 4-at qaangiutsinnagit Naalakkersuisunut naammagittaalliuutigineqarsinnaapput. Aalajangiinerit annerusumik upperisarsiornermut tunngassuteqartut taamaallaat misilinneqassapput inatsisitigut tunngavinnut attuumassuteqarpata.”

## § 2

Inatsisartut inatsisaat ulloq 1. januar 2014 atuutilissaaq. Peqatigisaanik Ilagiinni atorfinitsitsisarnerit pillugit Inatsisartut peqqussutaat nr. 8, 30. oktober 1998-imeersoq, atuukkunnaarsinneqarput.

*Imm.* 2. Ilagiinni atorfinitsitsisarnerit pillugit Inatsisartut peqqussutaat nr. 8, 30. oktober 1998-meersoq naapertorlugu malittarisassat aalajangersagaasut piunnartinneqartulluunniit atorunnaarsinneqarnertik imaluunniit Inatsisartut Inatsisaat manna allatigulluunniit inatsisit naapertorlugit aalajangersagaasunit taarserneqarnertik tikillugu atuutissapput, kisiannili Ilagiinni ikiortit atorfinitsinneqartarnerat pillugu Namminersornerullutik Oqartussat nalunaarutaat nr. 39, 29. december 1998-imeersoq atuukkunnaarsinneqarpoq.

*Namminersorlutik Oqartussat, xx.xx. 2013*

Aleqa Hammond